

die Säfte des Weins vnd Kornß durch Kunst zu Concentriren vnd in die Engte zu ziehen / vnd fueglich an solche örter zu bringen da man geldt für haben kan.

Alhier aber möchte die Frag fallen / wie die Säfte der Kräuter / Hecken / Stauden vnd grossen Bäumen heraus zu pressen / vnd wan sie heraus / was sie doch (dieweilen sie weder zu essen noch zu trincken taugen / wie diese auß den Korn vnd Wein) für Nutzen geben können ?

Darauff ich zu verstehen gib / daß zwar kein Speiß oder Tranck daraus werden kan / aber doch andere ding / welche der Mensch auch nicht entzathen kan : Nemlich gute Medicamenten, wie auch guth Goldt vnd Silber / dar für man neben dem Wein vnd Korn / auch nothwendige Kleider / vnd was sonst den Menschen neben dem essen vnd trincken mangelt / zeugen vnd reichlich schaffen kan : Also daß man Ja an keinem ding mangel hette / der gütige Gott seine dürfftige Kinder so reichlich vnd weißlich